

Ọkwukwo izi Jemisi

Nhne gbasiri ọkwukwo izi ka

Ọkwukwo izi Jemisi jiharuru n'agida ezni o nyernu kpakara rumu Chiokike gbasaruru n' "rime kpakara ọwa." Jemisi ji agida nhne anya n'ọbochi neezni nhne ke enine, neegesi kpa nye Karaịsi kwesiri o ji akoniche wu budnu n'ọwa. Jemisi kwuru ọka gbasiri ọba eze, ọwa, ọrnurna, agwa ọma, okewa, ọkwnata mkpoma, riro, akoniche, okno ọka, oknomokno, ọzi w'ohnerne, okpe ele berere ikpe, nganga, ndidi n' okpukpe.

Ọkwukwo izi ka nookwu mkpa ọ zị n' badnu nwernu ọkwnata mkpoma n' nhne ọbula o neeme, lele kpa o kwesiri nye neekpenu Chiokike.

Nhne zị n' ọkwukwo izi ka

Ọpanizo (1:1)

Ọkwnata mkpoma n' akoniche (1:2-8)

Ọdna ọwa n' eze (1:9-11)

Ọrnurna (1:12-18)

Ọnurnu n' omume (1:19-27)

Ọdo aka n' nsị gbasiri okewa (2:1-13)

Ọkwnata mkpoma n' ọrnuru (2:14-26)

Nye Karaịsi n' riro a (3:1-18)

Nye Karaịsi n' ọwa (4:1---5:6)

Ezni zị ọdo n' ọdo (5:7-20)

¹ Mawa, Jemisi, nye izi ke Chiokike n' ke Nyenwe a' Jizọsi Karaịsi, neebekwu kpakara ele ke

Chiokike, ke bụ avnuru nri nụ ẹbo ele Chiokike zị nụ rime kpakara ọwa.

Okwnata ovu n'ige ọrnurna

² Rumu nda m, ọ bụru nhne snarnima ige ọbula anụ dnabnarnu nụ nhne ọrnurna zị ọdo n'odo. ³ Kwnornu nụ ọ bụ ọkpa ọkwnata ovu iru jeegweya ndidi. ⁴ Ndidi rnuzu ẹnu a, ma anụ bụru ele zuru ozu, ọ zá nhne kọgwu. ⁵ Ọ bụru nụ o zị nye nwée akoniche, nye wam rịo n'aka Chiokike, nye neenye kpakara badnụ hite nụ mkpoma ọma a, ọ zá naakpasị iwhnerne. O jeenye a. ⁶ Nye wam jeeji ọkwnata ovu nọorio, o nwéko mkpoma lawuru. Nye nwernu mkpoma lawuru nụ lele abaka-mini osimini, nga ruwhere neewhe, ọ nọtulizo a olu. ⁷ Nye kị chéko nụ o jeenwehia nhne ọbula n'aka Nyenwe aị. ⁸ Ọ bụ nye mkpoma lawuru, o gwúzole kwem nụ kpakara apna a.

Ọdna ọwa nụ eze

⁹ Nnwọ nda ke bụ nye mboni nwudna nga Chiokike gwelizọru a olu. ¹⁰ Nnwọ nda ke bụ nye kwu nwudna nga Chiokike gwednarnu a ẹli. Kwnornu nụ nye kwu jaagawhe lele igwugwere ọhia. ¹¹ Nga ẹnam wasiri n'orne bẹkwnu a, ọ chnagbu achara, igwugwere a dnahnala, mma a kwome masị. Kpam masị, nye eze jaagawhe nụ kpakara ẹnu a.

Ornurna

¹² Ngozi jaazinu nye wam ovu a siri rikne nụ ige ọrnurna, kwnornu nụ o megbu ọrnurna, o jeenwehia budnu kwó okwo ke Chiokike kweru ele whnuru a n'anya mkwna. ¹³ Nga be naarna anụ

orunna, nye wam kákwadia, “Chiokike naarna m orunna,” kwnornu nu o zá nye nwernu rikne rna Chiokike orunna, Chiokike rna badnu orunna. ¹⁴ Kovu be naarna badnu orunna nga nhne ojo ke mkpoma noto a, ma o duwhu a. ¹⁵ Nga nhne ojo ke mkpoma wam turu rime, o muhia mmehie, mmehie masi sopiya, o muhia enwu.

¹⁶ Rumu nda m me whnuru n'anya, anu kwé be duwhu anu. ¹⁷ Kpakara nkesi oma nu nhne buru oma neehi n'oligwe naava, n'aka Nda ke keru iwhne, nye zá naagbanwo lele kpa enine naagbanwo. ¹⁸ Chiokike pioru o gweru ikwu-onu ke ezi oka a muhia ai, ma a buru mkpuru mbom ke kpakara nhne o keru eke.

Orunu nu omume

¹⁹ Rumu nda m me whnuru n'anya, anu mahia ka, kpakara badnu ziri gnarnagnarna n'onuru, kovu o buo n'okwu oka. O wé masi eni wara wara. ²⁰ Nye ovu owe eni nwée rikne mee nhne jaamasí Chiokike. ²¹ Kwnornu nu ka, anu gweme kpakara rune nu kpakara agwa ojo ke jipiharu mkpoma anu. Anu gweru eni anu bita nu mkpururu Chiokike, nahoru oka wam ke nwernu rikne o zohia mkpuru mkpoma anu.

²² Anu buru ele neeme nhne oka wam kwuru, anu buko ele nonu onu kpoi, needuwhu eni anu. ²³ Nye obula ke nonu ikwu-onu wam kpoi, kovu o zá neeme eme, nu lele badnu ke neelekiri ruwhnu a nu nyno, whnu ruwhnu a kpa o nu, ²⁴ o lekirikwo eni a, ngangam, o whoga, chezume okpa badnu o bu. ²⁵ Kovu nye obula ke neelegidne anya n'iwu wam zuru ozu ke neeme badnu nwernu eni a,

ke naadazigidne nụ rime a, ọ bụo nye nọonu ọnu neechezu masị, kọvu nye neeme nhne iwu wam kwuru, Chiokike jọgozi nye wam n'ernu a.

²⁶ Ọ bụru nụ nye ọbula bụ nye neekpenu Chiokike, kọvu o knésige riro a eriri, ọ nọghonu mkpọma a aghigho, okpenu Chiokike a bụ nhne etekne. ²⁷ Okpenu Chiokike ke zị snam, ke be mérula emeru nụ ruwhnu Chiokike bụ Nda aị, bụ ka, o chenwanya rụmu nwée nda nụ nne, nụ ele rinya nzi be nwurru nụ mmekpẹhni be, nụ badnụ ọ bita ẹhni a rịchna hite nụ nhne ojo k'owa ka.

2

Ole badnụ anya nụ ruwhnu

¹ Rụmu nda m, lele ele kweru nụ Nyenwe aị Jizọsi Karaisi, nyenwe igwugwu, anụ lékọ badnụ anya nụ ruwhnu hite nụ ya naakpa ike. ² Ọ bụru nụ nye kwu ke gbagwụ aị mkpaka golu, woru iwo marnụ mma va n'ogbako anụ, nye mboni ke wogwu nkukara iwo va masị, ³ ọ bụru nụ anụ sọbisinu nye wam wogwu iwo marnụ mma, kanụ a, “Daziri nụ ngadna ka,” kọvu kanụ wọmboni wam, “Gwuzoru hna, mọbu daziri n'eli etekne n'ochi m,” ⁴ anụ kpála ike, bụru masị ele ikpe ọriri ojo marnụ?

⁵ Anụ bnote nsni, rụmu nda m me whnurnu n'anya, Chiokike hōrulam ele mboni ke ọwa ka, mee be bụru ele kwu n'okwnata ovu be, be bụru masị ele o jeenye ẹli-eze wam o kweru ele whnurnu a n'anya mkwna. ⁶ Kọvu anụ lednarnụ wọmboni anya. Ọ bụo ele kwu wam neemegbu anụ? Ọ bụo be nọopnurnu anụ zne ọro ikpe? ⁷ Ọ bụo ele kwu noolulu rẹwhna ọma nye wam nwe anụ?

⁸ O bụru anụ bīta iwu Eze aị ke oligwe ke be gbarụ n'okwukwo nso, “Whnụ nye agbatibi i n'anya lele ẹhni i,” anụ mekwarụ nkari. ⁹ Kọvu o bụru nụ anụ le badnụ anya nụ ruwhnu, anụ mehielem. Iwu jeegesi nụ anụ dnarnụ iwu. ¹⁰ Nye ọbula ke jaabīta kpakara iwu, kọvu dna otu kpọi, o dnanam kpakara iwu wam. ¹¹ Kwnornu nụ nye wam karụ, “I mékọ ọyi,” kamasiri, “I gbúko badnụ.” O bụru nụ i méne ọyi, kọvu i gburu badnụ, i bụ nye dnarnụ iwu. ¹² Anụ kwu, mee masi lele ele Chiokike jeeji iwu ke neeme badnụ nwernu ẹhni a kpe ikpe. ¹³ Kwnornu nụ nye nwée mkpoma obirizi, Chiokike jọdonu a obirizi nga o jeekpe a ikpe. Obirizi nọonwudna n'ikpe ọmuma.

*Okwnata ovu nwée ẹrnu
bụ nhne etekne*

¹⁴ Rụmu nda m, ndaa mbnarna ọbnarnu o bụru nụ nye ọbula kaa, “M nwernu m okwnata ovu,” kọvu ẹrnu a gésile a? Okwnata ovu kpọi o jọznohia a? ¹⁵ O bụru nụ rụmu nne rukna mọbu rụmu nne rinya nwée iwo, mọbu wiri oriri, ¹⁶ mbnarna kịni bụ nhne o bnarnụ, o bụru nụ otu badnụ n'esilawuru anụ kanụ a, “Lekwarụ anya, o nyee i iwo i joowo, chī i iyi, nụ wiri i jeeji riji rụwho,” kọvu o nyéne a nhne ke zị anọ-ẹhni mkpa. ¹⁷ O bụ masi kpa okwnata ovu ke nwée ẹrnu bụ nhne nwurnu ọnwu.

¹⁸ Kọvu otu nyenum jaakaa, “Otu badnụ nwernu okwnata ovu, nye berere nwernu ẹrnu ọma.” Gesi m okwnata ovu i ke nwée ẹrnu, m jeegesi i ẹrnu ọma m hite nụ okwnata ovu m. ¹⁹ I kweru nụ otu Chiokike, o bụru ọma. Ele rẹnwu ojo kwe masiri, be naama rururu tū ogwu. ²⁰ Ji nye iwhnirniwhno!

I pioru ọ mahija nọ ọkwnata oву ke nwée ẹrnu bụ nhne etekne? ²¹ Gweru Ebereham nda aị nọ nhne atụ. Be gwnụsiri a nọ nye mee mma hite n'ẹrnu ọma a, nga o jiri Aziki nnwọ a rukna kwa ariohna n'olu ojo ariohna. ²² I whnurnu nọ ọkwnata oву a nọ ẹrnu a rnukotaru ẹrnu. Ọkwnata oву a zuru ozu hite n'ẹrnu ọma a. ²³ Nhne be gbarụ n'ọkwukwo nsọ mezuru ke kwuru, “Ebereham kwerru Chiokike, Chiokike gwnụsinu a nọ ọ bụ nye mee mma.” Be sukwu a enyi ke Chiokike. ²⁴ Anụ whnurnu nọ be gwnurnu badnụ nọ nye mee mma hite n'ẹrnu ọma a, ọ búo hite nọ ọkwnata oву kpọi.

²⁵ Kpam masi, gweru Rehabu nwerinya ewhere nọ nhne atụ. Be gwnurnu a nọ nye mee mma hite n'ẹrnu ọma, nga o kwubnanyarnu ele varu ọ dna ndidna hi n'eli Izireli, zihala be n'apna berere. ²⁶ Lele kpa anọ-ehni bụ nhne nwurnu ọnwu hne enine zila, kpam masi, ọkwnata oву bụ nhne nwurnu ọnwu hne ẹrnu zila.

3

Ledu riro i anya

¹ Rumu nda m, kpakara anụ búko ele zni nhne. Kwnornu nọ anụ magwu nọ ele zni nhne jeenwe agida ikpe kakwo ele berere. ² Kpakara aị naadnahie n'agida nhne. Nye zá naadnahie nọ ikwu-ọnu bụ nye zuru ozu, nwe masiri rikne ọ chikota kpakara ehni a. ³ A neekne ọnu iyinya eriri ma be mee nhne a pioru be mee, zne masi hne a pioru be zne. ⁴ A gweru ọgbo mini lele nhne atụ, ọ bụ n'ezi nọ o zị okpotokpo, okne ruwhere noovughari a, kovu nọ nye risi ọgbo ji amarna matị nọtughari

ogbo penupe obula nye risi ogbo pioru. ⁵ Kpam masi, riro bu nhne mati zi n'ehni ai, o nootu oka k'agida. Le kpa igbogo hna ezi bu ke bekwnu mati mernu o nwuzo bekwnu. ⁶ Riro bu bekwnu. O jihiaru nu agida nhne ojo n'esilawuru nhne zi ai n'ehni. Riro bu nhne neemeru badnu, nomusi budnu bekwnu hite nu bekwnu eli renwu.

⁷ Badnu nwernu rikne znu, znu masilam kpakara nhne be keru eke, mobu anohia ke zi ogwnu zi ichne ichne, nu onunu obula, mobu aznu zi nu mini, nhne obula nopnu opnu. ⁸ Kovu nu o za nye nwernu rikne znu riro. O bu nhne ojo ke za naadazi bidim. Nhne gbu badnu zi nu rime a. ⁹ A ji riro naaznarni Nyenwe ai nu Nda ai Chiokike. A ji masi a novu badnu onu bu nye be kpuru n'oyiyi ke Chiokike. ¹⁰ Otu mmamma nu ovu onu neehi nu otu onu wam nowhuya. Rumu nda m, o buo oma o zi kpam. ¹¹ Be tuhia mini so n'onu nu mini lu nlulu n'otu omi? ¹² Rumu nda m, isisi figi o nwernu rikne minya mkpuru isisi olivu? Mobu isisi vaini o nwernu rikne minya mkpuru isisi figi? Mini arua, o nwernu rikne gbahia mini so n'onu?

Akõniche zi ichne ichne

¹³ O buru nu o nwernu nye zi n'esilawuru anu ke nwernu akõniche nu oghohia, o gesi a hite nu budnu a, hite masi nu agwa oma nu ogwedna ehni a eli ke hi n'akõniche. ¹⁴ Kovu o buru nu mkpoma anu jihiaru nu okwno-awuwa, nu ovu nlulu, nu aka-nchni, anu kpa nganga. Anu mee ezi oka gho aghalaghala. ¹⁵ Akõniche ke nu kpam hige n'oligwe va, o bu ke owa. Enine Chiokike zila nu rime a. O bu nhne ke renwu ojo neezni. ¹⁶ Hne okwno-awuwa

nụ okewa zị, ọgba aghara ghara jaaziri. ¹⁷ Kọvu akoniche ke hi n'oligwe va, beru ọsno ziri richna, omekwo, o nwe udno, o nwernu mkpoma ọma, naadnakota n'otu, o nwernu obirizi nụ ọnu ọma, o nwée aghigho, ọ kwu ezi ọka. ¹⁸ Ele neeme udno naakpa mkpuru udno. Be jọoghohia mkpuru ke imerne ọma.

4

Enyi ke ọwa

¹ Ọ bụ kini noovuya ọlu ogwnu nụ ọdogbuta n'esilawuru anụ? Be hi nụ nhne ojo ke nọogwnu mkpoma anụ, ke nọolu ogwnu nụ rime anụ. ² Anụ pioru nhne, kọvu anụ nwéhiála a, anụ jiknenu o gbu badnụ. Anụ piosi nhne rikne, anụ nwée rikne nwehịa be, anụ jiknenu nọdogbuta, nọolu ogwnu. Anụ nwée nhne anụ pioga kwnornu nụ anụ ríola n'aka Chiokike. ³ Anụ nọorio, kọvu anụ zá nanahịa kwnornu n'oriri ojo ke mkpoma anụ, ma anụ gweru a mee kpa o jiri masị anụ.

⁴ Anụ ele kwé be tükwasi anụ ovu! Anụ máa nụ nye ọbula ke whnurnu nhne ọwa n'anya k'agida nye wam bụ nye irno ke Chiokike? Nye ọbula ke pioru ọ bụ enyi ke ọwa neeme ẹhni a nye irno ke Chiokike.

⁵ Anụ chéko nụ nhne be gbarụ n'ọkwukwo nsọ bụ etekne, “Chiokike neelegidne Enine Nsọ a o yisiri nụ rime anụ anya k'agida.” ⁶ Kọvu Chiokike neenye aị oru k'agida. Lele kpa be gbarụ a n'ọkwukwo nsọ, “Chiokike noogwuzogidne ele oknomokno, kọvu o neenye rụmu mboni oru.”

⁷ Anụ bíta ẹhni anụ nụ mkpururu Chiokike. Anụ nyigidne Ekwensu, ọ jaagbawhu hne anụ zị. ⁸ Anụ

kpayabetu Chiokike ndundu, o jaakpayabetu anu ndundu. Anu kwnosnama aka anu, anu ele aruru-eli. Anu snusnama mkpoma anu, anu ele mkpoma lawuru. ⁹ O gbu anu igbugbu, anu ru owa, anu gba mkpe! Rumu anu ghọ ekwna. Snarnima anu ghọ o gbaru ruwhnu. ¹⁰ Anu gwedna ehni anu nu ruwhnu Chiokike, o jeegwelizo anu olu.

Anu kpéko ibne anu ikpe

¹¹ Rumu nda m, anu kaja ibne anu. Nye obula ke naakaja nnwo nda a, mọbu neekpe a ikpe, o naakaja iwu, neekpe masi iwu ikpe. O buru nu i bu nye neekpe iwu ikpe, ngam, i buo nye naabita iwu, kovu nye ikpe iwu. ¹² Chiokike kpọi bu nye neenye iwu nu nye ikpe. Ya nu nsnunu a nwernu rikne znohia ai mọbu gbumekwo ai. I bu nyele ke neekpe badnu ibne i ikpe?

Anu luu onu nhne ekile jọbu

¹³ Anu bnote nsni, anu ele naakaa, “Tna mọbu ekile, a jeezne mba ka mọbu mba kiyari daziri pji otu awha, gba mgbama ahia, kpa agida iwai.” ¹⁴ Anu ma nhne jeeme ekile. Ndaa nhne budnu anu bu? Budnu anu nu lele iknorno-mini ke whuyaru, dazi ige mati, omekwo, o whume n'anya. ¹⁵ Ka bu nhne anu znernu okwu, “O buru o masi Nyenwe ai, a jaazi budnu mee ka mọbu mee kiyari.” ¹⁶ Kovu kitna, anu noolu onu, neeme oknomokno. Kpakara o luu onu ka buo oma. ¹⁷ Nye mahjaru nhne buru oma o mee a, o mene a, o bunnu a mmehie.

5

*Be dọru ele eze aka
nụ nsni*

¹ Anụ bnote nsni, anụ ele eze. Anụ kwna ẹkwna, si okokoba kwnornu nụ nhne igbugbu ke jaadnakwasị anụ. ² Ẹkwnu anụ roru oro, akịka takwolem iwo anụ. ³ Kpakara golu nụ siliva anụ tulam ajari, ajari a jọbu nhne akebne megidne anụ. O jeerne anọ-ẹhni anụ lele bẹkwnu, anụ ele kpabitaru ẹkwnu n'ọbochi ipne-aznụ ka. ⁴ Anụ bno nsni, anụ kwula ele anụ gnornu ẹrnu n'ẹkwu anụ ogwo ẹrnu be. Ogwo ẹrnu be naakwna, nhne o nọokpokwu anụ dulam nsni Nyenwe aị Chiokike ke Meli Nhne Dum. ⁵ Anụ wuru budnu oriri nụ onwunwo n'owa, anụ mee lele kpa o masiri anụ. Kịtna, ẹhni anụ ke gbarụ ọto jiknernunem, neese ikpe naava ava. ⁶ Ele aka be zị rịchna bụ ele anụ marnụ ikpe, anụ gbu be. Be mènne anụ risi rikne.

*Ọsnuta mkpoma
nụ mmekpẹhni*

⁷ Rụmu nda m, anụ knata mkpoma tem Nyenwe aị va. Nye ẹrnu ẹkwu ji naaknata mkpoma nụ mkpuru zị okne onu ahia ke ẹkwu a mịi, tem mini ozuzo mbom nụ ke ipne-aznụ zo. ⁸ Anụwa masị, anụ knata mkpoma, dazisi rikne, kwnornu nụ ọvuva ke Nyenwe aị zị ndundu. ⁹ Rụmu nda m, anụ nwéma mkpoma ojo n'ẹhni ibne anụ, ma Chiokike gharụ o kpe anụ ikpe. Nye ikpe gwuzogwu n'onu-mgbo jiknernu o va. ¹⁰ Rụmu nda m, anụ chenwanya nhne ele ọwhnurninya kwuru nụ rẹwhna Nyenwe aị. Anụ gweru be lele nhne atụ nụ ọknata mkpoma nụ rime mmekpẹhni. ¹¹ Anụ maam nụ

a nookwu ele wam ele ọwa ọma kwnornu nụ be knataru mkpoma. Anu nurnu oknata mkpoma Jobu, anu maam nụ Nyenwe aị donnu a obirizi n'ipneaznu, kwnornu nụ Nyenwe aị bu nye obirizi nụ nye imerne ọma.

¹² Rumu nda m, anu jí oligwe mọbu ọwa mọbu nhne berere du risi. Oka anu buru owe, owe, mọbu ọza, ọza, o zi Chiokike kpe anu ikpe.

Okpukpe be kperu

n'okwnata ovu

¹³ O zi nye obula n'esilawuru anu ke zi nu mmekpehni? O kpe okpukpe. O zi nye ovu nọoso n'onu? O gwnu eri oznarni. ¹⁴ O zi nye obula ke naaria ehni igbugbu? O sukwu ele okno badnu ogbako Chiokike, be kpenu a okpukpe, te a mono olivu nu rewhna Nyenwe aị. ¹⁵ Okpukpe be jiri okwnata mkpoma kpe jogwo nye nriria wam. Nyenwe aị jeeme ehni si a rikne. O buru nu o mehieru, Chiokike jaagbarunu a. ¹⁶ Kam kpararu, anu kwuhianu ibne anu mmehie anu, anu kpenu ibne anu okpukpe ma be gwọ anu ehni igbugbu anu. Okpukpe nye mee ọma nornusi ernu rikne. ¹⁷ Elaija bu badnu etekne lele aịwa. O kpesiri okpukpe rikne ma mini gharu o zo, mini zole du awha eto nu enwa isunu. ¹⁸ O kpe kwno okpukpe, oligwe gweya mini ozuzo, eli minya mkpuru. ¹⁹ Rumu nda m, o buru nu otu badnu n'esilawuru anu kpahalaru n'apna ezi oka, nye berere kwuhnahie a, ²⁰ anu mahia nu nye mernu nye ojo tuhnasna n'apna ojo a, znohiaru mkpoma a n'enwu. Nye wam kpusnirni agida mmehie.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89